



**Äntwert vun der Ministesch fir Landwirtschaft, Ernährung a Wäibau op d'parlamentaresch Fro n°4156
vum éierewäerten Deputéierten Jeff Boonen**

1. Wéi laang weess d'Madamm Ministesch Bescheed, datt Lactalis wëll d'Kontrakter mat de Lëtzebuurger Mëllechbauere kënnegen?

Den 21. Mee huet Lactalis BeNeLux schrëftlech eng Entrevue fir de 28. Mee beim Landwirtschaftsministère ugefrot. Bei dësem Rendez-vous, den 28. Mee um 16 Auer, hunn d'Vertrieder vu Lactalis de Landwirtschaftsministère doriwwer informéiert, datt si de Kontrakt fir d'Ofhuele vun der Mëllech vun de Produzenten vun der Prolek net méi géifen erneieren an domat ab dem 1. Abrëll 2027 keng Mëllech méi ofhuelen.

Kuerz virun deem Rendez-vous, den 28. Mee ass de Landwirtschaftsministère vum President vu Prolek doriwwer informéiert ginn, datt Lactalis si scho moies iwwer dëse Fait a Kenntnis gesat hat.

2. Krut si Grënn fir déi iwwerraschend Decisioun genannt?

Lactalis begrënnt seng Decisioun mat der staarker Volatilitéit vun den internationale Mäert fir Botter a Mëllechpudder an der zouhuelender internationaler Konkurrenz. Fir sech un dëst Ëmfeld unzepassen, wëll de Konzern seng Ofhängegkeet vun de Commoditymäert (Basisprodukter) reduzéieren an seng industriell Organisatioun nei ausrichten. Well d'lëtzebuergesch Mëllechcollecte historesch op dëse Mäert baséiert, huet Lactalis decidéiert, de Kontrakt nom Auslaf am Mäerz 2027 net méi ze verlängeren.

3. Wéi vill Kilo Mëllech sinn hei zu Lëtzebuerg betraff a wat ass den Undeel vun der EKABE un der gesamter Mëllechproduktioun?

Den Informatiounen no vu Lactalis, liwweren d'lëtzebuergesch Prolek-Produzenten all Joer ronn 54 Milliounen Kilogramm Mëllech, dat entsprécht 10-15% vu der Lëtzebuurger Mëllechproduktioun.

4. Wéi vill Kilo Mëllech ginn um Site Eeschweller verschafft?

Zousätzlech zu den 54 Milliounen Kilogramm Mëllech ginn um Site zu Eescheler ongeféier 40 Milliounen Kilogramm Mëllech aus dem Ausland pasteuriséiert a konzentréiert.

5. Vu wou soll d'Mëllech an Zukunft hirkommen, wa Lactalis d'Kontrakter mat de Lëtzebuurger Bauere kënnegt?

Et goufen keng weider Detailler iwwer d'Hierkonft vun der Mëllech matgedeelt, déi hei zu Lëtzebuerg pasteuriséiert a konzentréiert soll ginn.

6. Wat soll an Zukunft um Site produzéiert ginn?

Déi industriell a logistesche Aktivitéiten sollen um Site zu Eescheler bäibehale ginn.

7. Wat geschitt mat de Marke vun der EKABE?

Lactalis ënnersträicht de Wëllen, d'Entwécklung vun der traditioneller Mark EKABE zu Lëtzebuerg weiderzeféieren.

8. Ginn et kuerzfristeg Léisunge fir déi betraffe Betriber, respektiv, ass et méiglech, fir eng aner Molkerei fir si ze fannen?

De Prolek-Komitee an seng Memberen si aktuell amgaangen, alternativ Ofsazméiglechkeeten ze evaluéieren. De Landwirtschaftsministère steet dobäi zur Säit a wäert déi néideg Ënnerstützung am Kader vu senge Méiglechkeete leeschten.

9. Huet d'Ministesch eng Entrevue mat de betraffene Produzente geplangt?

E Méindeg, den 1. Juni, ass eng Entrevue tëscht dem Landwirtschaftsministère an de Verrieder vu Prolek virgesinn, fir en Austausch iwwert déi aktuell Situatioun an déi méiglech Perspektiven ze féieren.

10. Hunn d'Molkereien déi um Lëtzebuenger Maart aktiv sinn, nach fräi Kapazitéiten?

Aktuell ginn d'Veraarbechtungskapazitéite vun de Molkereien, déi um lëtzebuergesche Maart aktiv sinn, analyséiert.

11. Wéi ass déi aktuell Situatioun um Mëllechmaart?

De Mëllechpräis um lëtzebuergesche Maart ass zënter Enn 2025 zeréckgaangen. Op EU-Niveau schéngen sech d'Präisser ze stabiliséieren.

12. Sinn nach aner grouss privat international Acteuren um Lëtzebuenger Mëllechmarché, déi änlech kéinten handelen? Wéi ofhängeg as de Lëtzebuerger Marché vun privaten Acteuren?

Ausser EKABE, déi zum fransésische Grupp Lactalis gehéiert, gëtt et zu Lëtzebuerg aktuell keen aneren privaten Acteur am Mëllechsektor. Déi aner Acteuren um Lëtzebuenger Marché si genossenschaftlech organiséiert (Luxlait, BIOG, ARLA, HOCHWALD) oder méi kleng spezialiséiert Betriber.

Lëtzebuerg, den 1. Juni 2026

(s.) Martine HANSEN

Ministesch fir Landwirtschaft, Ernährung a Wäibau